

出使美日秘國日記

出使美日祕崔日記

十月初一日雨

聞俄國欲佔高麗西北境之某地時英國駐紮日本之戰船名鄰打極斯文卽已奉令發煤俟得令卽起碇嗣又聞俄所佔者爲乾慶道尙非扼要之地而英國駐日諸兵船均嚴隊以備調動又聞美國欲租巨文島以積煤云 因按俄覬覦巨文島而英力爭之非所以納交於朝鮮也非所以要譽於中國也妒俄之益其強耳英於北海無屯煤之地而俄人得巨文島則英兵艦之力將不行於北洋是俄強於英矣歐洲有約不許俄之兵艦出黑海而俄乃於亞洲得屯煤之島是日本朝鮮一帶將讓俄威令獨行矣全力

爭之此英之勝算也

初二日陰

美商言中國每年入口煤油約值銀二百萬兩由美至者居十之七八聞英員由直隸至山西陝西遊哈什噶爾有日記記之 廣東創鑄銀錢通行商民使之 因查銀錢通用外洋之擅其利者百餘年前此呂宋本洋至以七錢三分之低銀當中國之銀八錢有零民間因其行用之便不折色不短秤故也中國自鑄銀錢其庶幾不爲外洋專擅乎

初三日晨起霧重至不見人

金山華人分黨自相戕殺九月二十四日至二十六日連戕三人

已飭領事示禁 墨洲合南北中共十七國擬公築鐵路一條以  
相聯屬先派員查勘而後興工其經費按版圖之大小分派美國  
應派查勘之費六萬五千元總統已飭議院核派矣 因查墨洲  
合南北中共十七國其能自立國者南惟智利北惟美耳其餘皆  
小國民數少而武備未修近日英人多強佔其地故有戒心合全  
洲而造一鐵路將聯墨洲各國以防外患之乘也

初四日晴

撰小呂宋設領事條陳赴美派駐巴西公使江嘉處道喜 俄國  
撤馬兒罕鐵路造成又增至塔什干地方法人於越南開礦得洪  
基煤寶煤礦出煤甚多每日可出五十頓再過三月漸次開闢每

日可得五百噸云 云者斯德廠兩次來電請驗軍器覆以明日

起行越日開驗 巴黎來電議院訂來年水師經費謂船廠不必

過巨礮之三十噸者可穿現在兵船鐵甲新造兵艦每點鐘可行

十八米云

計中里六十里

因按船礮之力只求可以破現在之兵艦此

以船攻船之意也義國之鐵艦其用百噸之礮者亦不過能破現在兵船耳故法之水師無他求也若俄之克龍斯達的礮臺其鐵甲厚四尺八寸雖百噸之礮亦無以破之此其所以雄視歐洲乎  
初五日晴

卯刻起飯畢乘馬車赴火車廠已初開車隨帶繙譯武弁共三人於未刻附輪船過海峽乘馬車至紐約飯後戌刻眠 美國商人

與華人合夥運木板至中國出售此事若成又奪中國之利矣  
因查自洋布洋紗入中國而女紅失業自煤油洋燭入中國而東  
南數省之柏樹皆棄爲不材自洋鐵洋針入中國而業冶者多無  
事投閒所以然者外國用機製故工緻而價廉且成功亦易中國  
用人工故工笨而價費且成功亦難將來木植入口中國之地產  
又多廢棄矣

初六日雨

卯初起辰初飯辰正坐馬車起程赴火車棧云者斯德廠主已派  
一人導引由火車至紐海飛地方約三百餘里又換馬車行七里  
至廠廠中司事三十餘人工人一千餘人當卽查槍箱刀箱彈箱

提出數箱開驗此槍係一管而入五錠可以連環而發五錠盡出再入五錠尙爲靈捷設靶於一百碼外五彈均中易槍亦如之自午初驗至申初所驗已多當將已驗者另作二箱黏封封固遂入客棧飯畢仍乘馬車至火車廠赴火車至紐約又僱馬車至領事署飯後已戌正矣隨僱馬車至火車廠亥初開車寅正到華盛頓車廠俟至天明始回使館已辰初矣 調金山領事署隨員黎榮耀至華盛頓

初七日晴

前日至紐約見大街兩傍上有輪車來往詢之巡捕方知紐約地方街衢來往人衆街不能容故於離地數丈之上建造鐵架與屋

頂齊卽於其上行駛街車以免擁擠英國倫敦京城則於地下掘深六丈建造鐵路以備輪車行駛且用電燈光明如晝其經營可謂巧矣皆所以便民也

初八日晴

接云者斯德廠信並單其中尙有游移之語函令改正 接北洋信卽發書至各屬令辦直賑 美國戶部核自上年七月一號至今年六月三十號止此一年內共入欸計四百零三兆九百八十二元自開國以來祇有兩屆多於此數較之前年多入一千六百零三萬九百二十三元查此屆一年之內出欸共二百九十七兆七十三萬六千四百三十六元除正用外尙餘一百五兆三十四



萬四千四百四十六元又支二千三十萬四千二百二十四元收  
回國債之票仍餘八十五兆有零 因查四百零三兆合中國之  
銀三萬五千萬有零較中國入款蓋四倍矣

初九日晴

金山華人自相殺讎致美國派巡捕緝拿恐釀事端急發告示令  
總領事設法解散以期安靜 聞美廷此次東省之官多爲南黨  
緣北黨去年新議加稅不便於民故舉者少也 亞巴連埠又創  
驅逐華人之例並不許華人經過當晤外部告之 因昨閱美國  
戶部出入之欸因思中國今年洋關稅欸所入不滿二千萬兩入  
口之貨值銀一萬一千九百八十八萬餘兩出口之貨值銀九千

六百九十四萬餘兩兩比仍漏出銀二千餘萬兩當思所以挽之  
初十日晴

卯初率參贊繙譯各員朝賀晨設壽麪晚設醢 檀香山公使來  
見訂兩國立約答以務將貴國旅居華民加惠以待但使華民安  
業自然可議現尙非其時也 因考中國究心礦務開平基隆均  
開煤礦尙屬有利近聞直隸因水災開平鐵路被折基隆煤礦出  
煤甚旺而法人於光緒十年攻臺灣時焚燬煤油五百箱延及煤  
礦至焚去煤一百餘萬噸迄今尙有餘燄皆可惜也

十一日晴始見薄冰

謁律師並答拜檀香山公使該公使頗肯保護華人居心甚厚

英人施旦來前至阿非利加洲之內地工額紅地方與野人共處  
施以教化教以開墾阻其讐殺久之相安遂以該地爲省分以施  
旦來主之今年回英英之君臣皆敬之迎迓有加禮焉完婚後擬  
卽挈眷以往聞其地曠土有八十萬英方里較之中國輿圖幾有  
其半可謂廣矣 因查地球四大洲近澳大地亞亦稱洲則爲五  
洲亞洲開最早歐洲次之墨洲則三百年前猶混沌也澳洲則二  
百年前猶混沌也阿洲則現在猶混沌也曠土至八十萬方里豈  
石田歟抑無人開墾耳然則留天地不盡之藏當以阿洲爲第一  
也請誦山樞之詩

十二日晴

美國水師軍械所今年華盛頓礮廠造成四寸徑者四尊五寸徑者兩尊六寸徑者七十七尊八寸徑者十五尊十寸徑者四尊共造而未成者四寸徑者十二尊六寸徑者二十五尊八寸徑者二尊十寸徑者三尊現又續造十三寸徑者又擬造新式機器礮爲陸軍之用以後膛來復綫爲主 華盛頓所屬之阿比典埠來電言該埠之華商於本月初三日被土人驅逐出境不准稍留其業經出境者已有二十人矣 謁律司照會外部

十三日 晴天氣轉暖

中俄陸路通商去年入口之貨值三百五十萬羅卜合中國銀二百六十萬兩中國出口往俄以茶爲大宗本年已遜於前二年然

亦值八百餘萬兩蓋出口多於入口幾三倍矣 聞越南歸法人保護後法國設關於各口征稅華人至越南者每名納身稅五元以後按年照納至出口時又納三元近以華人到越日少又改爲有法領事護照者可以免納但須按期出境否則仍納身稅

十四日晴

查歐洲之教有三入羅馬教者一百六十兆人入希臘教者八十三兆人入耶穌教者八十五兆人又回教五兆人猶太教五兆人英本國之民只三十五兆合屬地計之則多日斯巴尼亞在一千八百八十四年人數十七兆二十六萬人 西藏距京都一萬四千餘里其境極西之阿里南地方距中印度僅二千餘里英人既

得五印度竭力經營東南之緬甸英已顯踞之矣近又請於中朝於西藏通商將來由緬甸印度兩境以窺藏中國之兵力鞭長莫及英則聲勢相通當綢繆未雨也

十五日晴

接云者斯德廠信所售槍彈尙不肯具結已再發函矣 十二日新報云法國所造新式兵船名吟那脫能在水底駛行極爲靈便法廷擬照此式再造大者一艘現在之船長一百三十英尺外有厚甲水面水底惟所用之均可攻敵 美水師部大臣諭管理船工事務司員須籌善法令兵船鐵甲緊貼船身使爲脫落查兵船鐵甲每塊重四十噸令其貼緊船身殊非易易該司員商議未得

善法擬訪查各國船廠然後興工 聞英屬新金山等處設立章程凡華人入境按名納身稅一百圓共意欲使華人畏而不來也華人仍陸續而到該地土人亦無如何現計華人僑居新金山各埠者已有四萬人又有在打士米尼亞與紐西蘭兩島者約四萬七千人查此兩島地面不大而華人之到者如此之多可見中國民數之衆也 因查華人之至美國也由廣東至英屬卡拿大需船價銀五十兩入卡拿大境又納身稅五十圓再由卡拿大潛入美境其費稱是蓋較新金山爲尤多矣而源源而來禁之不絕者則以有利可圖也

十六日晴是夜大雪及地而化

致南洋會信爲購槍驗槍事 去年英國出口鋼鐵四百十餘萬噸可見礦利之盛 蘇格蘭新造鐵橋於佛德河約長三十里爲地球至大之橋計費銀一千二百餘萬云 日本於一千八百七十九年商務之利只六十兆今則一百三十六兆蓋已倍之 南花旗瓜的馬拉國新用電燈而煤油入口已減一半中國似可效之 和國君薨英俄法三國恐德國之併其地也遂聲明共保和之土地云 因謹按俄皇與德皇時時爲衣冠之會而德皇又常赴英正不僅周禮所言歲相問頰相朝矣且英與法嘗合以伐俄矣法之拿破侖第一又嘗屢與俄英劇戰矣乃於和闌君薨之時則合法以防德非有所愛於和闌也蓋歐洲各國之於強國陽則



親之而陰則忌之其親之者以其強其忌之者亦以其強也和與德爲鄰德之易併者也和不足惜而德併和則德愈強而足忌此三國之所爲合以防之也吳起之言曰吳越世仇也當其同舟濟而遇風其相救也如左右手此之謂也

十七日晴

美國加力輪船由太平洋來聞中國鎮遠兵船觸礁傷底船頭亦壞幸駛到岸擬開往上海修治云 美國新定稅則收取華人入口日用之物征稅甚重當飭金山領事詳查 是日總統訂於亥初見巴西國水師提督遂並訂見各國公使 因於戌正三刻偕參贊繙譯等乘馬車至總統宮各部臣已到各國公使陸續而到

總統至偕其夫人立門內外部立總統之左首巴西水師提督率兵官先入門握手爲禮墨西哥公使繼之又因率叅贊以下繼之皆握手爲禮遂至堂中見朝鮮使臣日本公使墨西哥公使並郵政部大臣總察院律司均作周旋並遊觀前總統華盛頓及其夫人各畫像禮畢而退返署約子初

十八日 晴冰不解有霜始發火爐

美國駐華公使來電云中國已定由京設立電綫直達俄國之西比利亞省之企阿克他卽恰克圖地方該地係蒙古北界 外部訂於午刻偕同各國公使及巴西國水師提督乘小輪船往觀華盛頓之墓並定挈眷屬因一人往日晡而返 因按巴西國在南

墨洲土地之廣與美相埒開闢年歲與美相同乃民數僅十兆而常有內難則以治國者之無人也美得華盛頓手定章程不百年而國富至四十倍宜巴西提督之欲瞻仰其墓也

十九日晴

拜發請禁呂宋票密摺 俄國近見華人與朝鮮人之居於烏蘇里邊省者日眾喧賓奪主擬加重華人及朝鮮人身稅而招本國人往給地令與耕 因查近歐洲各國人民來美者光緒十五年比十四年少十萬人然自光緒八年起已減於初矣去年來美者德國約十萬人英之三島約十四萬人那威瑞典約四萬五千人自光緒八年起至十四年歐人之來美者計十四兆其中英人四

兆德人四兆半瑞典那威八十萬法國三十五萬而埃爾蘭一省之人已三百五十萬然則華人之來美者較之歐洲諸國微乎微矣

二十日 陰天氣轉暖

十八年爲中美約十年之期兩國或須商訂因密託美紳覓美國與歐亞各洲所立之約預屬繙譯譯出以備將來換約之用蓋以中美條約有一體均霑之語他國所得於美者中國亦可言也

聞

醇親王疾尙未痊山東巡撫張曜已奏派凌某入都診視惟祝天祐宗親早占痊好實爲普天之幸 南黨勞完昔曾充副總統練

達老成今年七十八歲祝壽者盈門南黨之到者尤多因亦躋堂稱賀焉

二十一日晴天氣又轉寒是夜大雪至地而化屋上稍積如霜

昨日美國已開議院當即擬照會外部文藝與律師商酌故至律司處面議一切日本議院亦於昨日開議日君親臨議院宣諭新充上議院長者即子爵伊都前曾爲相日本之變革本國規模一仿泰西即該員創之也俄廷現招徠其民赴土耳其吉司丹地

方

此地與中國新疆毗連

開墾緣本國地曠民稀恐中國或土耳其國開墾

則鞭長莫及故擬造鐵路直達西比里亞之東偏各省以期聲勢聯絡云因按此路若成中國銷茶可期暢旺而邊務亦嚴矣

二十二日 大雪至地而化屋上約二三分厚午刻雪止

美國開議院午刻下議院紳到院者二百二十七人聽總統宣諭之外議紳並無別議上議院紳在堂中聽諭者祇數人其餘均在堂外聚談 因居美國兩見開議院矣將開議院之前十日美外部分送各國公使准入議紳憑據一紙可持之以入一擴聞見意至美也院式圓空其中環而坐各有案紙筆均備有所見則書於紙刊於報示至公也無酬應之煩摺雜之習拘束之勞寬其禮數而實事求是華盛頓誠人傑哉

二十三日晴

前亞墨利加南北兩洲派員來美會議以爲今日防患興利之務

莫如合南北兩洲造一鐵路通聯各國爲一氣各國均以爲然茲聞各國一律派員至美訂於今日至外部衙門會商一切 金山稅關新立章程於華商回華重復來美之照必由洋人簽名而簽名之洋人又須親到衙門洋官處發誓擔保方足爲據云 繕照會一道照會外部爲詰問苛禁華工之例也

二十四日 陰天轉暖

下議院紳專理各國人民入境者名奧印新倡一例凡他國人民入境或以犯上之道害於人心風俗或無所倚賴以爲生計或有狂疾此三種人未來者不准入境已來而出境者不准再來又不准輪船公司招誘他國人口來美做工惟巧匠工藝爲美國所未

有者准其來美但須先立合同 俄國報謂一年所收酒稅計二百四十五兆羅卜合中國銀一萬四千餘萬兩又新闢荒地種糧每年多收糧九千餘萬石 因查俄地苦寒而商務不盛其入欸每年亦至銀三萬萬餘兩者則以取於民之法全仿歐洲故也其國勢偏重於歐洲故風氣於歐洲爲近觀其所收酒稅雖未必實然亦可見其大略也

二十五日陰

律司科士達來見言墨西哥公使因聞中國自鑄銀圓欲見其式樣請寄大小各一圓示之 因按墨西哥國前屬西班牙時中國所用銀錢名本洋者皆該國所鑄計自西歷一千五百三十七年



至一千八百二十一年所鑄本洋約二千一百五十一兆自一千八百二十年後墨國自主至一千八百七十八年每年約十六兆又至現在則鑄鷹洋每年二十五兆共計四千二百四十七兆合中國銀約三十萬萬兩其奪中國之利甚鉅矣

二十六日 雨雨中夜大雪

俄國現在黑海所造兵艦今俄廷諭令趕速造成又多置造水雷船云 廣東黃埔船局前已造成廣成廣己兵船兩艘今年又造成廣玉廣金兩艘均係鐵脅鋼皮馬力五百匹左右配以克虜伯礮每半時行四十餘里風氣漸開我

國水師漸可恃矣 因按各國大興海軍增造兵船茲將光緒十

六年後此四年中所造戰艦合以前計之英國重鐵甲七十六艘  
輕鐵甲九十艘法國重鐵甲四十八艘輕鐵甲十四艘德國重鐵  
甲四十艘輕鐵甲十艘俄國重鐵甲二十七艘輕鐵甲八艘義大  
利國重鐵甲十九艘輕鐵甲十七艘美國重輕鐵甲合之共一百  
四十五艘

二十七日大雪約厚二寸

謁議紳好德言及中國謀國者欲加洋藥之稅良具苦心而不能  
強英之從也洋藥一項英國獨擅其利而中國大受其害民爲之  
弱俗爲之貧英國每年售銀四千五百萬兩當中國禁種鴉粟之  
年則增至五千四百萬兩中國雷厲風行禁種鴉粟而英人暗喜

子以爲何如也因曰禁種鴉粟一事或以爲宜或以爲不宜辨論紛紜各執一說嘗於大庭廣衆之中有質疑於因者因以爲中國宜禁食而不宜禁種也以禁種爲宜者則曰禁種卽所以禁其食耳因曰子以爲禁種則無可食耶印度之洋藥入口者已增至值銀五千四百萬兩矣子以爲再無可增耶其人再欲有言因乃直詰之曰英國禁食而不禁種中國禁種而不禁食二者孰爲失算其人乃無言以對夫洋藥者乃中國一大漏卮既不能禁外國之來又不能禁民間之食惟有聽其自種以塞漏卮將來亦如煙草耳煙草之初入中國明代始亦嚴禁而終不能繼而自種今則遍地皆煙矣然則欲除洋藥之害以禁食爲第一上策以禁種爲第

一下策以加稅爲不得已之策以聽其自種爲塞漏卮之策如是而已該紳亦以爲是

二十八日晴

昨日金山來電云檀香山國王業已到美其來非僅爲遊歷也聞國主以該國之民心屢變控御爲難而慕美國之政治故特至美與美外部面商擬將該國版圖售與美國爲安全之計查檀島出口之貨以糖爲大宗其運入美國者計二百餘兆磅合中國二百六十餘萬兩美國新定稅則本國所產之糖每磅減收稅銀二分如檀島改爲美之屬地則糖稅每年可減五百萬圓但不知美廷願受該島否

二十九日 大霧

紐約新報云近來各國大興兵輪以新易舊其評論水師者或以兵船之多少爲衡或以船身之大小爲斷其實不足憑也蓋新式兵輪與舊式者相角其用大殊其力或一可敵百新式之兵輪其益有五能容萬噸一也護礮之甲厚至一尺六寸二也船身之甲全用鋼板三也半時辰行至五十中里四也入水未久船料堅固五也由此而論則各國水師之力可較其短長矣今天下各國之水師當以英爲首法第二義第三德第四俄第五美之新造一萬噸厚甲者三、一千噸厚甲巡海者一艘此四艘者造成然後可居第六日斯巴尼亞第七中國第八惟中國尙未得法雖有堅船

尙無把握日本之船不如中國而布置駕駛得宜如中日交兵中國尙難操必勝之算也云云 因按該報所言地球各國水師形勢瞭然然亦有不可盡信者德之水師實亞於義義之水師不過旦大羅杜意留二船其礮係一百噸者爲各國兵船所無耳至謂日本之水師布置得宜直是阿其所好以日人之盡棄其法而學西法且又屈節足恭於各國如是而已然我國之柄政者聞之藉以自省益可以自強矣

三十日 晴是夜大風如吼

美紳楊約翰前曾充駐中國公使現在倫敦報館當初因出都過天津時大學士李曾面屬 因以該員應與聯絡以期交涉有益因

過天津曾造其廬則已赴倫敦今年來信一道歉意

茲又來信言已續絃並於今日到華盛頓訂午刻相見因援客敬主人則先拜主人之禮先偕繙譯往謁寒暄既畢言及時事該紳謂中國既興海軍又興鐵路富強有基將來定爲亞洲望國矣因言美國禁制華工殊失交涉持平之意該紳謂此工黨之意當路徇之該紳又言美國新訂加稅則例頒行後銀行既多累歇民怨沸騰茲聞外部調駐墨西哥之公使回美想因新例既行墨國礦產入美既須加稅墨國卽照美國新例亦設新例以報美國凡美國之牛羊入墨國口者一律加稅以致美國牛羊不能行銷故調回籌商善後之策也 因言中國之所以報美苛待華人者其

事甚多中國將來亦當行之楊約翰無言遂散

十一月初一日 大風晴

倫敦來電云祕魯國債共五十兆計五千萬圓向以所產烏糞爲質自爲智利所敗與智利立約所有烏糞之地概爲智國佔實債主多英人故英廷與智國理論智廷許以烏糞之地暫還祕國十年先清國債昨已成議前此之遷延未成者以有法人從中作梗也今山美商格黎士說合矣 因查光緒十年間中國以智祕之戰華民傷亡損失財產曾託美國駐智公使勞覲代向智利外部索償智利外部云華人所業有體面者甚少衆所共知無論性命財產遭沒於智人之手者爲數亦屬有限不允何其直截今乃以



已據取之烏茲甘讓英國十年又何前倨後恭也豈非懾於英之強耶

初二日 風止晴

美國魯士委省茵陳地方有揭竿爲亂者美廷已飭埃俞埠之帶兵官率所部三百一十人往剿又派員司圭也等至金山查華人之工作營生者有無攙奪土人之利今已查回言土人閒有失業者實被華人賤價所妨云云 因謹按自英美之洋布創行而中國之織者失業自英美之輪船創行而中國之舟人失業自美國之煤油入華而中國之榨坊失業自美國之鍼入華而中國之工藝失業中國之失業者多矣此數萬人之至美而致土人之失業

者未及萬分之一也美廷何以如是用心之深耶其亦爲我中國一思焉否耶

初三日晴

楊約翰來見談及議院前派上下院紳分往各處地方查考外國民人來美情形以便設法整頓整頓之道以禁止華人入境爲最要茲上議紳司圭也稱華人到金山准否登埠之案臬司斷得不准者只百中之五實因華人形貌相似巡捕難爲辨別又稱華人由英屬加拿大潛入美境者甚多該地與美之北界毗連戍守之兵甚少防範不周如欲禁華人來美須撥巨款添兵防守此陸地也又華盛頓省之西北海口名飄折者小島甚多華人近多山此

而入應撥快船巡查海面方可防閑現在美國禁華人入境之例雖嚴而行之不得法故無效耳此外只作寒暄語

初四日晴

昨日美國駐華公使來電云中朝奉

上諭准各國駐京公使每年覲見一次云嗣又得總理各國事務衙門來電較詳當卽分行照會美日祕各處 美國駐巴拿馬領事代理華人此次巴拿馬埠土人謀逐華人聚衆千餘人沿街呼嘯華商盡行閉門其勢岌岌當電託美領事阿丹信向該埠總督言本領事有保護華人之責今土人謀逐華人貴國何以不問如不禁止本領事卽電本國立派兵船來埠該總督謝過不遑立卽

撥兵彈壓槍斃土人數名遂得相安因既作書謝該領事又照會美外部道謝

初五日 陰是夜大風雨

英國倫敦日報云俄國已向法國定造來復槍五十萬桿訂明十八個月一律交足 或問地球各國有欲與俄啟釁者乎因以爲無有也或曰法之拿破侖以及英法義奧合縱之舉非用兵於俄乎因曰拿破侖第一伐俄俄人焚木司科城法人幾於匹馬不返英法義奧伐俄之舉終不得志自時厥後遂無加兵於俄者矣德人嘗言以兵伐俄俄地苦寒所運之糧僅以供守鐵路兵弁之用不能濟戰兵也然則俄地之險誠不止秦關百二也曰然則其修

武備如不及者何也曰不如是不足以肆其蠶食也

初六日大風排圍樹枝多折大雨爲風所激射玻璃窗如鎗窗爲之裂者甚多未刻風雨止見日影夜雨

法國軍制明年陸軍兵官共一萬二千二百七十八人內總兵官一百九十人副總兵官一百九十九人游擊一千零四十七人千總四千一百六十人把總三千六百六十一人副把總三千零二十一人省報載各國准於來年西五月二十號在奧都公議郵政章程美廷現已派定人員前往同議云因謹按郵政一事中國不可不早議也蓋非惟國計所在而國體亦存焉中國郵政屬於官每年費公帑三百萬而驛遞之遲驛政之弊不可勝言美國

版圖不若中國之廣民人不若中國之多而歲入至五千萬焉此  
國計所存也中國寄外洋之信因未與各國郵政會至不能通於  
是上海則用日本之士旦焉各國寄信以小印黏封而謂之士旦廣東福建則用香  
港英人之士旦焉夫古巴之所以用日斯巴尼亞之士旦者以其  
爲日之屬地也中國因陋就簡苟且爲之而不知其於國體有礙  
也光緒九年十二月美外部來文云華商來美金山稅關查出書  
信七八千封又三千餘封又八千餘封均以不黏士旦議罰經鄭  
使以中國驛務詳告之得不至罰而書信二萬封均沒入矣夫中  
國不設士旦中國之自失利權耳而外國且苛待之是并礙國體  
矣故於各國之會議郵政附誌之

初七日 兩辰初見雪遽止

金山領事左庚來稟言美國所派議院三人云查金山民數實係  
專查華人該議院紳至金山寓九層樓客寓金關稅司晉接後卽  
攜巡差到唐人街看驗查訪次日在合衆衙門先傳稅關人員訪  
問無不詆訾華人巡役名白話得言華人自六會館以至商工無  
非下流應請一律驅逐出境又傳中國副領事傅烈祕到堂訪問  
傅領事則爲華人辨白越日又傳六會館商董到堂問六會館之  
意何居華人果否皆作奸犯科商董亦極力辨誣次日議紳遂啟  
行回華盛頓 因按美國之視華人如此其議紳所詢如此處心  
積慮彰明較著欲其廢棄苛虐新例不亦難乎 祕國來信新派

嘉西勒士爲駐英公使卽祕之前任總統也 美國議院議派員  
赴阿拉司屈屬邦振興地利查阿拉司屈係美國前所買之地爲  
捕海龍起見此外無所欲也買得後始知鑛產極旺地又近水太  
平洋輪船來往所由將來開採既易運費亦廉其利溥矣

初八日晴

美國紐約城商民因銀根緊急均提存款以至市面急迫銀行紛  
紛倒閉幸政府籌議開帑出現銀一千三百餘萬兩目下商人漸  
漸見信云 美兵部大臣卜絡大昨日以條陳交上議院謂太平  
洋一帶地方宜擇要地設一礮廠以備海防軍火之需需費一百  
四十八萬四千二百圓請議辦云 上議院紳宣文遞一條陳請



立一例凡新增稅則與各國條約有不符之處免照稅則而行  
因按此當係暗指英與墨西哥檀香山而言英墨檀各國以美去  
年所定之稅噴有煩言相與立例報復美自知其窒礙故爲此模  
稜語耳 德國南鄙有信云俄國於波瀾仍復如前增兵德國兵  
部大臣因令東方各省凡二旗守兵之處各加一旗以備不虞  
初九日晴

德國水師有大鐵艦二十艘小鐵艦十五艘大巡船八艘小巡船  
十艘尋常巡船四艘礮船三艘練船十艘兵船九艘共十八萬九  
千七百九十六噸汽機馬力共十八萬七千八百九十匹礮共五  
百三十三尊官與兵共一萬七千八百六十員名 天下各國電

綫之長短十五年底爲止已有一百六十八萬九百英里之長可環地球赤道三十次

初十日晴陰天氣轉暖不能著棉

英人於美之祕林地方漁捕海龍美外部之意謂祕林海面應全歸美管轄他國不得過問英外部則謂祕林四岸不能全屬美國西岸一帶地方本屬俄也按萬國公法海面歸美管轄者不過十里之內而已兩國齟齬英外部以爲當請局外之國秉公判斷而美外部不從美總統擬即將兩國往來文案交議院議之 阿非利加一洲荒土最多現英法德比各國已於其地設局開墾俄人亦於土耳其所屬之亞弼尼亞地方開墾云前此之未能遽開者

鐵路未成故也今其時矣

十一日晴

卯刻起盥洗拜

牌行三跪九叩禮繙譯二員未到是日早設饌晚設醺聞英國數十年前擬定章程每年以銀二萬磅爲鼓勵人才之資凡有獨出心裁有益軍國者賞銀六百兩從此英才輩出國勢日以富強地球五大洲墨洲鐵路爲最多亞墨利加洲之南自東海至西海鐵路長二千七百餘里其地山最多而亦最高歐洲鐵路所經山之高者不過五百七十五丈而墨洲之山有一千餘丈者且其鐵軌之尺寸不同故火車不能直達山於未通盤籌畫也北洲鐵

路自東海至西海已有五道其最大者長一萬餘里墨洲之勢南不敵北觀於鐵路而可知矣 英國有一鹽地有十一見方英里鹽厚七十尺每畝有鹽二十萬噸所有之鹽足供天下八百年之用云

十二日晴

俄奧兩國現在堅持前說不認巴西爲民政之國緣俄奧之君均與巴西前王至好故俄王聲明巴前王一日尙存斷不認巴西爲民政之國也 新報謂德國陸軍新式之礮全是鋼質每尊重八百四十磅比舊礮較輕矣查舊式礮重九百磅益以礮架則三千九百六十磅新式之礮連架只二千七百磅是已輕一千餘磅矣

新式裝彈之車每乘重三千九百八十磅較舊式之車重四千四百四十磅者亦輕四百二十磅矣 因按陸軍以進退便捷爲勢  
礮與車均輕自能趨利乘便德之陸軍所由甲於地球也

十三日晴

美國向規於是日投贈珍物以聯縞紵之歡 因備湖縞熟羅四端  
磁瓶一對繡花絲巾一盒送外部布連又備綢縐磁器茶葉等物  
分送律師及上下議紳 初十日報云法國議員正當查詢歐洲  
各國水師強弱情形不意查出本國水師辦理不善之弊緣德與  
意三國前年同盟互相保護意在西制法東制俄其兵船於一千  
八百七十年合計一百九十艘但計至一千八百九十五年則可

期有五百五十六艘該三國自一千八百七十一年以來整頓水師共費銀七百萬圓計七萬萬圓及查法國兵船在一千八百七十一年共計四百零五艘至一千八百九十五年可期二百九十九艘蓋自一千八百七十一年以來法國爲水師軍務所費之欸共計九百兆圓矣 謁律師科司達查訪美國派議紳至金山查各國人民果爲何事律師謂此非定例然議院可創行其查各國人民者防有逃犯病狂之徒干礙昇平之局也又詢美國稅則新訂何意律師云此中有報施之意有保全出產之意所謂報施之意者如美國新訂糖茶加非牛皮此四宗入口免稅凡產糖茶各國固得便宜矣但必將詢問所得便宜之國何以相報如有以相

報則照新章免稅以優待之如無以相報則卽獨收該國一國之稅此物此志也所謂保全出產之意者如他國入美國之貨多則美國自產之物滯卽加稅以阻其來近來限制華人及前此增收中國所來米綢各稅卽此意也

十四日 陰是夜大雪

美國以是日爲耶穌生日故自總統以至庶人均停理事總統新派布郎爲合衆國總察院此公持論夙稱平正察院得人矣 西班牙來電日君有諭增修稅則并派員與與國重訂通商條約 日本西京海口十年以前交易只銀一千萬兩去年已增至三千萬兩又日本與泰西更換之約只准西人雜居內地不准購買地

段

十五日 大雪至辰刻而止

上議院紳密組新上條陳請議院飭專管律例之員詳細查議限制華人之例當限至何年何月一節議院近以未便卽議須俟後日覆之 法人攻佔越南其弁兵皆以越南瘴重而吸鴉片及至返法乃不能除聞沾染漸廣矣 和國欲招華工於蘇門答臘地方種煙德國新闢阿非利加洲亦由駐滬之商人米也稟請招工聞尙未允 外部之友雷德請茶會亥初赴會子初而返見法公使副外部又見前任外部之當差之員極言美國新例苛制華人之不公因領謝之 俄國貸銀一千五百萬磅造西比利亞之鐵



路以爲此路成後用兵經商兩便與美國太平洋一水可通云  
法國明年將造頭等大鐵艦三艘鐵甲各厚十八寸其造費已核  
定矣 墨洲合南北十八國議造通用銀錢用資通商之便利均  
已派員來美公議擬於十二月初八日卽西歷明年正月十七號  
在外部衙門開議云 因查外洋各國無不自鑄銀錢所以便民裕  
國也中國向不鑄致墨西哥專其利者數十年近由廣東省自鑄  
能推廣之則收回利權矣

十六日 大霧申刻小雪而止

昨日巴拿馬來電言祕魯近復不靖緣前爭總統之皮亞羅拉自  
出亡後卽至厄瓜多國以圖恢復其舊黨於本月二號聚於利馬

都城外之山打加打理那礮臺糾眾以謀舉事官兵知覺急往攻  
擊叛黨接仗被斃四十人各鳥獸散居民驚惶 考近日地球之  
電綫而知電綫之有益而不可不設也美國電綫七十萬英里法  
國二十二萬英里英國十八萬英里而屬國尙未計俄國十七萬  
英里奧國十萬餘英里

每一英里合三英里又三

天下最熱之處在波斯

西南濱海之處蓋波斯海灣也當西七八月之間無論日夜寒暑  
表恒在百度以上日中更上至一百二十八度則更熱矣其地掘  
井至五十丈無水人之所以得生者幸有波斯海灣中泉水湧出  
不窮云

十七日 晴是夜微雪

倫敦來電德奧兩國人民在俄屬波瀾地方傭工者俄廷業已下令盡逐出境 昨日下午議院紳到議院者五十人相聚不半時而散定於下禮拜二再議 美人市律遊金山言金山天時地氣均合養蠶種桑擬請美廷興辦蠶桑以收利益 因按美國自華盛頓自主以來國富已四十倍或以爲可以知足爲天地留不盡之藏矣何必竭力勞心日以興利爲事乎而不知此卽美之所由富也耕三餘一耕九餘三古人嘗謀十年之蓄矣美民之用心亦如是耳

十八日晴遷於西房

俄之黑海一帶地名跋庫又名巴屯向產煤油近年日盛除美國

外當推俄矣又聞比國近來亦產煤油比跋庫地方尤多且近海口印度雖產而不多尙不足供本境之用此近日煤油情形也美產煤油每年一千七百二十萬桶俄則一千萬桶每桶計三百零五斤 郵政局章程寄本國書信無論遠近價值一律自英國訂定寄外國書信無論遠近價值亦一律由德相畢思麻訂定自此以後郵政一而利亦溥矣 美總統謂各國漁船於祕林海捕捉海龍致本國土民生計日絀英之漁船尤多擬一概禁絕英國以爲宜請局外之國公斷美總統謂祕林海係美地與他國無涉不允 因按華人來美美以有礙土民生計而禁之乃又施之於英國漁船可謂霸道并不欲由局外之國公斷焉是專欲矣英國其

肯從乎

十九日晴

歐洲西方五大國若英若法若意大利若德若奧所有各廠各肆所用之女工分而計之英有四百五十萬法有三百七十五萬意大利有三百五十萬德有五百萬奧有三百五十萬云美國整頓水陸軍務於鐵甲槍礮彈子火藥實心考究求其盡善今試驗已竣知其利弊惟於各種火藥之力尙未真知因查歐洲大國有兩種火藥一爲直力用之槍礮一爲橫力用之炸碎炸藥之性比直力者尤猛茲水師軍械廠新造炸藥名爲挨門乃脫性極猛烈特令華盛頓礮廠造大礮一尊以試驗此藥云 因嘗讀禮記曰命

工師令百工審五庫之量金鐵皮革筋角齒羽箭榦脂膠丹漆母或不長今之用器雖殊而用意則一也人適於器器適於用熟審於平時庶不倉黃於臨事也能治其國家誰敢侮之

二十日陰

俄都來信俄廷新定則例自明年正月一號起國中田地不准質賣與猶太人猶太商人前受俄廷優待准置田地以後不准另分畫一地令猶太人居之他處均不許居聞猶太人見此苛例多思離俄云 查各國所開銅鐵之礦按年計價美國值銀四萬二千二百四十萬兩英國二萬二千二百萬兩德國八千四百萬兩巴西四千八百萬兩法國四千萬兩比國二千八百萬兩奧國一千

六百萬兩義國八百萬兩 法國新定入口稅則已經頒示其稅則有二一謂之常稅一謂之輕稅常稅之則以後可以修改輕稅之則則一成而不易凡爲民食之各種五穀其稅有加者有照常者布匹與各種製造而成之物已一律加稅其爲民生所日用之物則一律免稅且有禁進口者云 或曰法歐洲之強國也於入口稅則議加議禁他國不敢置喙焉而不知非也日弱於法何以加法貨入口之稅墨弱於美何以加美貨入口之稅歐洲小國多禁鴉片入口者非強於英也蓋稅則者國之內政議加議禁固可以自主者也

二十一日 大霧外國元旦

總統於午初見各國公使外部自午正至未刻見各國公使并備  
茶點見後卽赴各部大臣道新喜衣冠用行裝大帽 檀香山國  
王本擬來美都茲已不來卽於今日回本國矣聞該國有信言國  
中現在情形英美兩國之人爭欲執政該國君初來美時美廷特  
派渣爾頓兵艦相迎英人不悅謂該國君之來美實欲與美廷相  
商將檀香山全島售於美廷美外部聞此言遂止其來美都以免  
英人之妒也 那威國有湖北極者以一木船裝一百七十噸或  
多至二百噸者特斜其式以禦浮冰帆船檣與機器並用半時辰可  
行六海里可裝煤與糧食足供十二人五年之食好事者助以英  
金一萬一千磅以壯其行 因按那威地處極北故好測北極從



前曾用輪船於五月冰解時過北極海而返據云至地球北極之地天樞一星當頂電氣至重指南針失準鐘表亦失常度今又往測抑以前次所測尙有未盡者乎

二十二日 小雨晴

赴各議紳道新喜至律師處商辦事件 美國前議於華人由墨西哥國潛入美境被獲者由國家出船資爲附船送回中國茲由合衆國衙門定例以後不給船資但送回原來之處 英屬卡拿大輪船輪車公司稟請該省總督請改限制華人之例緣限制華人後到者日稀公司生意清淡也該公司所稟求勿限制華人而所抽身稅五十元則未請減云 因按華人由墨西哥卡拿大兩

處潛行入美美國上下皆知將來又必設法杜之耳

二十三日晴

日本商務局悉仿西法近來船隻年盛一年本年商務較往歲多運貨物至十七萬噸之多附船人數三萬八千之多獲利又增五十三萬圓商務輪船增至十二隻夾板船照西洋式馬力一萬六千六百匹者計一千二百八十四隻本國式尋常之船計一萬七千一百九十四隻水師戰船不在其內商務日旺於此可見 考各國產煤之數英國每年一萬六千二百萬噸美國一萬二百萬噸德國六千五百萬噸法國一千九百萬噸比國一千八百萬噸奧國七百餘萬噸俄國四百餘萬噸 因按各國產煤之多不足

異所異者比國耳比國之地當中國三百分之一而鑛務最重故  
鑛產最多日本之地當中國三十四分之一而商船亦多然則以  
中國土地之廣而留心鑛務真不可限量矣

二十四日晴

美國前擬於太平洋整頓水師并礮臺茲已派上議紳二人下議  
紳三人水師官二人陸軍官二人會同巡察各處口岸撥一萬圓  
以爲巡察之費所派之人俟該議院議准卽往各口岸查驗礮臺  
水雷駐防兵艦等事限六個月竣事 本月初十日英美爲祕林  
海中捕海龍一事各執己見未有成議英廷請延局外之國秉公  
斷結美廷不允總統將以前來往文案交議紳公議亦堅執如前

茲英廷已出示曉諭英屬卡拿大地方人民昌言於衆凡英國漁

船在祕林海面沿岸三米之遙

每公法云一米合中國三里又三蓋萬國

尺寸爲所轄轄之尺寸過此則非捕海龍者英廷決意保護而又

一面照會美廷所有英國漁船在祕林海面捕海龍者如美國必  
欲苛禁巡船必欲緝拿英國兵艦必以力拒云云美國上下見此  
照會頗覺進退兩難

因按美國禁制英國漁船不准在美國祕

林海面捕海龍一事與禁制華人同一用意英之以文詞辨駁往  
來數四美廷上下堅執亦與中美爭論相同度美國官紳之意必  
謂可施之於中國者亦不妨施之於英矣乃英廷始則請局外之  
國秉公核斷不允則仗義執言謂美國之恃勢以蔑理者英國則

以勢行理此論一出美之外部及議紳能否仍前之堅執乎且徐而觀其後 法國有氣球家與天文家二人議乘氣球而至北極據其制法用雙層綢爲之外加以漆使不洩氣納以四萬五千立方尺之輕氣可起重八千餘磅另備引導小氣球四由北極而上以測氣候輕氣大袋四以備添補雙層氣球之氣散失球下所繫之舟包以薄銅內備丈八冰車一不沈之槎一並一月之糧氣球更垂繩與錨繫於上升之處以定其上升之高度據云在空中可十日可爲照相與各種格致試驗之事至氣球升後降回何處不能豫定然果試行順利則不在亞美利加之北卽在亞細亞之西云

二十五日晴

考地球各國所產銅按年計之美國七萬噸大呂宋四萬噸南花旗各國三萬噸德國三萬噸日本一萬噸新金山七千噸阿非利加七千噸俄國四千噸那威二千噸英國一千噸考各國所產鐵數按年計之英國一千三百萬噸美國六百四十萬噸德國四百二十萬噸呂宋四百萬噸法國二百三十萬噸俄國一百萬噸奧國七十九萬噸意國二十萬噸比國十八萬噸考各國商船英國七百二十萬噸那威國一百五十萬噸德國一百二十四萬噸法國九十七萬噸意國八十九萬噸俄國四十九萬噸奧國二十九萬噸和國二十五萬噸比國八萬六千噸 因按出禮云貨惡其

棄於地也力惡其不出於身也左氏云因地之利地球各國所講求而興之者實合此義其所興之數較多者其國亦較強治國者可知所先務矣 赴美內部大臣及博物院茶會亥刻而返

二十六日 大霧

美比釐積輪船由太平洋馬射島到金山稱德國兵船前至該島飭令該島酋長歸德國保護今已計定按年進貢列爲藩服云

暹羅國定造鐵路每一中里合銀四千兩 美國既增關稅以來

墨西哥亦重抽由美國進口之牛稅以爲報以致牧人大有所損

俄國槍礮藥彈由黑海輪船公司之船運往賽爾斐亞者其船單與保險單中皆不載明槍礮藥彈而以爲他物如近日所運之

過山礮則以爲洋燭其機密如此云 美廷現在定造水雷巡船一艘須比各國水雷船加速護院已定撥費四十萬圓備用聞水師部已有妥妙新法於舊式水雷巡船之好處一概兼用惟再增一速字耳 因按水雷巡船全爲進攻敵國兵艦及水雷船之用是以船上之礮利於極速故以機氣礮爲相宜其行以速爲主進可以追敵退則敵不能追此次所造擬每半時行海里二十三米蓋合中國幾八十里矣

二十七日晴

美廷於一千八百八十三年卽光緒十年飭軍器廠造十二寸大礮三尊以資試驗計全用生鐵者一尊鐵身銅膛者一尊加外箍



者一尊驗後知全用生鐵者實不可用鋼膛者已放七十次猶未損壞其加外箍者更佳據軍器廠員云以後造礮當以全鋼爲宜不用生鐵矣 聞日本今年各處產茶極佳製茶亦進九月查橫濱出口之茶較之去年多三十八萬餘斤合之神戶共多六百七十一萬斤爲以前所未有云 是夜亥初至子正美國家銀行總辦黨參茶會因於亥初到亥正而回見美將軍農部大臣上議院紳訂得孫等下議院紳好德等及墨西哥公使英法公使律司等而返以後到者尙陸續也 前勃而加利亞國之王哈吞腦爲俄所廢今爲奧國第二十七旗步兵副將云 因按勃君哈吞腦深諳韜略昔與賽爾非亞國戰勝之又爲俄國德國將軍亦皆重其

謀勇今俄主廢之忌其能也俄欲干豫勃國之政而肯容其英武之君當國乎

二十八日晴

美國巴鱒鮮地方由紳民查得其土宜穀宜蔗已集股本二千五百萬元招工開荒且云先造鐵路招工云 金山土人議遷徙華人街業經駁廢聞土人尙不甘心議集貲再訟云 美國除夕接征勦茵陳之總兵來電云二十九號與茵陳交仗勢均力敵我軍死傷共五十九人敵軍未知詳細請飭增兵以資得手 日斯巴尼亞來電云美駐日公使請日廷與美訂報施條約日廷云事不能行緣日與歐洲各國所約載有一體均沾字樣如以報施美國

則他國亦不得偏枯也 法國水師羣船泊於地中海曾用氣球測驗一切其球造自武備氣球廠球之大有萬一千三百立方尺鼓以輕氣扶搖直上下垂長十三丈之絲繩取其輕也繩之下端繫船之桅端如紙鳶之綫船中官弁乘氣球而上者言天晴時遠見十八英里至二十四英里下視海水雖深八丈游魚可數水下所行之物卽極深處亦知其所在是球也曾用巡船每半時辰行十海里半者隨之而行至二十一海里之遙一無所損水師中亦已用之當其大閱於維爾墨爾姆賽文之時亦已試之

二十九日晴

下議院管理美西西比河如中國之黃河隄事務紳士昨日請修

築河隄之總辦李朱到院訪其治河要訣據云防河之道有如防敵沿河隄壩自宜堅固但駐防官兵亦須時刻認真看守方保無意外之虞譬如禦敵雖有高城深池防兵懈弛亦無濟也現在沿河各省每年共撥銀一百萬圓以應河防之需如果議院另撥一千萬圓修築河隄三四年間可免水災沿河各省生民可免漂溺嗣後修守經費歲百萬圓當可支持云 內部大臣訂茶會偕繙譯往見美官名馬林者云前此三十年粵匪踞江甯時曾至中國京都卽咸豐十年事也 美國兵部大臣特派兵艦十六艘定於西二月集於舊金山海口聽令云 因查美國此舉必係駐美英使行咨外部大臣以有阻英商捕魚者則英國必以力拒等語是

以美廷亦調兵船以防之也

三十日晴夜中微雪

下議院管理各國事務紳請議院撥出使經費一百六十六萬五千九百二十五圓爲一千八百九十一年之用即中歷十七年查此次之欸較一千八百九十年減三萬九千八百九十圓云 倫敦來電云智利國內亂因議院與總統不合也 是晚九點鐘副總統訂於己宅見總統繙譯以無請帖不赴二等參贊以病不赴因一人坐馬車往至則女客到者已多男客甚少因往見副總統夫人夫人告以副總統尙陪總統醺飲略敘數語到者踵至男女擁擠約數百人蓋公使無不到各部及上議紳亦均到也凡夫妻

偕到者則妻先夫後與副總統之夫人握手握手後入門則女與女伴男與男伴不復倡隨到齊時總統出見立於人叢中男女環繞之競上作寒暄語握手而下禮畢總統仍自訪故舊談心至大餐房男婦均陸續入房隨意飲酒進饌啖水果大約女人多坐而食男人則立而食食畢則陸續出門己亥正矣

十二月初一日 晴夜雨

希卡果有華人名亞梅者在美讀兵書多年南北花旗交戰時曾在兵船當兵事平入美籍頗有蓄積爲美所重凡美國保舉總統及大員之期准令亞梅投籌 英京日報云中俄陸路通商自蘇彝士河開後貿易日減 俄之兵在亞細亞洲者共十三萬五千

七百六十名車礮共一百八十六尊內計步兵六萬餘名馬兵一萬一千餘名礮兵六千六百餘名修機器之兵一千餘名留後者步兵二萬八千名馬兵九千名礮兵二百七十一名鐵路兵二千餘名各處留守地方步兵一萬四千餘名礮兵一千餘名此第沿中國西北兩邊之兵數也駐歐洲兵數尙不在內 是晚亥初赴駐葡萄牙公使任滿回美之紳名羅陵宅茶會各國公使均到英公使以去年曾赴因醺彼此過從頗相得談論許久因詢因今年春赴日國涉大西洋頗眩暈否因答以向來不畏風浪西洋之浪雖大至捲船舷內人入海從者爲浪澆其頭自頂至踵水淋漓如出浴因不暈也問明年將赴祕魯乎因答曰然又問祕魯華人今

尙安居乎曰尙可又問金山華人近狀答以目前尙無燔逐之事  
又言英民之赴美者三十倍於中國其所以相安者因入美籍也  
入籍之利有三得國家保護之權一也與土人浹洽二也可以投  
標操保舉之權自總統以至議紳有所瞻徇而不敢苛刻三也中  
國之民何以不入籍乎因曰華民不願入籍我國家亦不欲強之  
則曰英民之入籍者豈竟舍英而安美乎大西洋來往之船英民  
往來如織美國不能禁也且德義兩國之民數較之中國僅十之  
一豈患人滿然其民之赴美者兩國亦姑聽之以衣食之計不能  
不聽民之自謀中國頗有人滿之慮矣聽其饑寒則弱者轉溝壑  
強者跳梁非國之福也且事無兩可者也中國如不願其民入他



國之籍則當守二百年前之舊例禁其出洋以遠禍機不宜聽其自投網羅而不之恤也談久已交子初遂散 因嘗閱使館積案見光緒十四年外部覆文言華人之衣服起居飲食已與他國之客民迥殊又不入籍此畛域之嫌所由生又言燔逐之禍實由自取今聞英使之言而益信

初二日 大雨竟日

聞德國因美之加稅各織布廠多停工工匠之無業者將攜眷來美新聞載德人之來美者較前五年尤多云 俄人議逐猶太之民已有出境者饑寒所迫傷亡甚多俄廷知之暫罷逐客之令太平洋中有衆島名加羅闌島本屬日國日之駐守弁兵與土人

滋事爭戰致將美之教堂轟燬今美廷擬向日廷爲教士索賠云  
初三日大風晴天氣甚暖

是日申刻赴上議紳福那茶會英法公使先已到內部兵部大臣  
續到敘談良久到者益多因以將發公文告辭而出 英廷派兵  
艦數艘赴北太平洋祕林海以視動靜美兵部已飭水師兵船十  
六艘會同各戰艦齊集於祕林海聽命 俄與中國伊犁交界之  
處有華人約百家相率遷往茂甫地方居住更有管田某公司招  
中俄交界華人千家往茂甫相近地方墾地按茂甫在中亞細亞  
向爲回部之地今屬俄國華人往者皆係回教人 墨西哥招工  
美國兩狀師爲之至粵省見兩廣總督言招工事不允遂中止

因按美國方禁華人而又爲他國招工無非見利忘義其禁華人也惡華人之分其利也其招工者卽以招工爲利但能招工數千人可於中取利也

初四日晴

英國浮司礮廠新造九英寸二分壳彈以破鐵艦前日試驗能透厚十四寸鋼鐵之板不日又將再驗云 是日總統訂於亥初見各國公使因於戌正偕參贊繙譯等員衣冠先到各部大臣多有到者至亥初各國使臣按到美之先後而入見總統偕夫人立門內握手爲禮夫人但點頭不握手入門後各公使相見道寒暄是會也公使畢到惟副總統未到各部大臣則內部外部戶部農部律政部郵

政部均見面律師科司達亦到下議院紳斯斌介因於元旦往謁  
不得其宅此次見面道歉遂訂於三日內往見 美國現在以水  
師之力遜於各國因大興製造鐵甲兵艦公私船廠因之用鋼甚  
多計近年各廠所出之鋼每年共計四百五十萬噸較十年前所  
出已十倍矣無非以供鐵甲之需云 因按美國所鍊之鋼十倍  
昔日具見廠務之漸興其添公私船廠以造鐵艦固爲水師增強  
起見然亦懾於英廷之言所謂英人捕海龍之船美國必欲禁制  
則以兵船保護力拒審己量力有所不敵故出此臨渴掘井之謀  
乎

初五日晴

日

記

卷五

祕林海面捕海龍一案英廷業已延請律師將該域帆船被拘之案控於美國總察院請予判斷外部大臣布連聞之深滋不悅

午刻出門拜會內部大臣戶部大臣律政部大臣郵政部大臣兵部大臣惟兵部未見餘皆登堂啜茗酒內部大臣戶部大臣之夫婦其人皆福壽者相也 德國與英國所易得之一島今定章程

統屬於布國本境之內其海口爲海防之要由國用內撥銀以築礮臺俾資鞏固 俄國於一千八百七十五年中歷光緒二年爲

興鐵路貸巨欸每百圓以四釐半起息茲爲減息起見籌借英金

十五兆磅

合中國銀六千餘萬兩

以四釐起息業已成議 法國現籌巨欸

以債票一百七十兆圓

合中國銀二千餘萬兩

歸國中人民自行交銀領取

山戶部大臣出示曉諭定期令願者屆期自赴該衙門交領初二日係發票之期未及黎明男女老少到者擁擠以銀易票爭先恐後於此見法民之能蓄積而法廷之取信於民也 因考地球各國無不有國債英法德美爲最多而不足爲多也彼皆貸諸本國之民所出之息楚弓楚得無分釐漏卮焉且英美二國之民共存銀於國家者皆願源源得息而不願收回焉其他則均貸諸外國矣有按年交息至五百萬者日斯巴尼亞是也有按年交息至五千萬者俄國是也有以歲之所入一半交息者土耳其是也有以歲之所入僅敷交息者葡萄牙是也有以歲之所入尙不敷交息者墨西哥是也有不能交息至以國中鐵路鑛產暫與他國作抵

者祕魯是也貸欸之流弊如此有不能不貸者當求取信於民貸諸本國庶與英法德美相同而不至受累胡底耳

初六日晴

是日爲上議院紳見客之期因偕繙譯於未初往謁外部隨至上議院紳宣門有司梯司不來奔伊門司伊華司杜甫賀利賀阿麥米蘭司丹佛各處敘談吸茗而別回車已黃昏矣 各國人之遷至美國居住者去年有四十五萬一千二百十九人較之上年已多一萬二千六百人猶太人計五百餘名爲俄所逐相率來美俄國來電俄戶部大臣核計明年兵費陸軍較今年應加四百六十萬盧布水師較今年加四百五十萬盧布

每一盧布合中國銀五錢五分

英將戈登前於同治年間爲中國出力隨淮軍勦平粵匪後回英國殉難於加東立像於賴發地方每至西正月二十六號忌辰英民爭送花以志不忘 因按戈登於同治初年隨淮軍征戰克復江蘇挽回東南大局與有勞焉事定後返英矣及湘軍平定陝甘關外中國向俄索還伊犁幾至決裂戈登自英至華謁李傅相并至京都願爲中國效力且上條陳其眷眷於中國血性過人固非常豪傑也宜其名在千秋中英兩國均不能忘焉

初七日 大霧晴天氣驟暖

聞倫敦耶羅船廠近日爲阿鎮丹國南墨洲造成水雷船一艘名北土司靈捷異常天下各國水雷船無一出其右者其馬力計一



千二百三十匹平常速率每半時可駛行二十八米如其上緊每半時可行三十米計中國一百里共長計一百三十英尺寬十三英尺五寸云 律師來見言茶會應辦事宜又管理紐約事務狀師來會言紐約華人事均欸以茶酒 昨日下午議院紳印羅於初五日請議院特聲明祕林海面捕獵海龍一案其中情節英美兩國外部大臣現已實心商議不日可期水落石出詎料英廷竟將此案控於美國總察院如此辦理於美國國體有傷茲議院宜通知總統使之轉告英廷 因按美之苛禁英船不准在祕林海面捕獵海龍作不順而施不恕其意實創自議院英使與美外部頻年駁詰美廷一意堅持英廷欲請局外之國判斷美又不允然則

英船被拘而不得直豈不大傷英之國體乎控於美之總察院英誠不得已也且欲使地球各國知議紳之中有霸道者也

初八日雨

日本新派駐美公使今到美都卽前任大阪總督名哥舒花緒那來見 巴黎來電云巴拿馬開河一案前公司辦理未成半途而廢近有法商擬再行招股集成公司請於法廷每年開彩票二次以所得之利供開河之費云 因按彩票之利其大如此呂宋票之設於上海垂三十年其始也每年得利銀四十八萬兩今則倍之蓋耗我中國之民財一二千萬矣 美議紳言美國派兵征剿茵陳尙難平定兵弁多傷 因按茵陳一種卽百年前墨洲所生

言之土著也歐洲開地者至此以力踞其地茵陳以勢不敵讓至僻壤美廷乃議每年餽以絨氈麪包助其衣食兩無猜嫌今官紳以此項度支爲妄費遂裁減之故至作亂於此見美國近年風氣不如前此之仁厚也 午刻巴黎薛大臣來電云

邱薨敝處照會四國外部酌下半旗數日總署來電初十初祭十六大祭亦下半旗屬各館一律成齊因伏念

醇親王性稟公忠天與德讓因於光緒十四年十月以

皇上親政初基謹獻芻蕘四事

醇政王以爲無所爲而爲遂蒙

上諭著鈔給

毓慶宮用備省覽知遇之感沒齒不忘茲聞噩音不勝哀戀當卽照會外部并請代達總統所訂二十日賜宴照例不到其餘各使館各美官紳茶會均函辭之

初九日小雨

美提督來會言義大利欲踞土耳其所屬阿非利加洲之的立玻利國土國已派兵五千前往防守并聲明該屬國之政如義國擅行干預則以兵戎相見云云 西十月二十六爲德國將軍毛奇特九十誕辰是日也其同僚各武員慶祝之後德主亦往祝嘏並稱述其前功德主出毛奇特一手執盛一手秉杖送之登車其步履與德主相彷彿云 因按將軍毛奇特卽前二十年統德兵而

破法國者也聞諸曾侯言該將軍知德法之將有戰局也自法旋德之日卽留心於法之地勢凡可進兵奪險者一一記之故以兵入法駕輕就熟而法不及拒度其精力有大過人者故其壽臻耄耄焉

初十日晴

本日爲

醇親王初祭之辰因恭率使館員弁設

位行禮

日高兩國立密約一爲高麗紅參准出口一爲日本布

疋准入口且減稅二兩高麗另於平陽省開通商埠頭不知已商之中國否 中日小約專爲互救沿海難民費用事立約三條

德比密約如德與法有戰事比願假道於德國以便行兵此係傳聞未知確否 因按歐洲各國蓋無有不畏法忌法者觀德比密約而可知矣然比向爲局外之國如德法交兵而假道於德則非局外所應爲故不敢信以爲確也

十一日 陰 巳後日出

朝鮮使臣李采淵來見 因本署有公文照會言

醇親王薨特來慰問 日本報云去年查點國內戶口今已查畢計男人二十兆有餘女人十九兆有零合共四十兆有零住房之不空者計七百餘萬間在本國而往他國之人計一萬五千七百一十一人又歐洲布法兩國人數計前五年布國二十八兆零法國

三十八兆零惟十年之內布國生養之數多於歿之數三百五十  
六萬有零法國只多七十八萬有零似人民之生息布勝於法  
因謹按日本人數向來只三十五兆雖能生息斷不能如是之速  
蓋日本每自誇其日盛如商務軍務之類大率張皇以聳觀聽今  
又張皇民數至於不倫則商務軍務之所謂盛者亦不過如斯而  
已

十二日晴中夜大雨傾盆天氣亦暖如中國八月時

美國近來試驗大礮飛射之勢合各國較之力最猛者首推英國  
計其所及可至十二米計中里四十里美國最猛者所及可至六  
米又三之一現在美國造成全鋼後膛礮二尊一爲八寸徑重十

四噸又四分噸之一受德國火藥一百四十磅彈子重三百磅計其速率每秒可射一千九百五十七英尺已試七十六次毫無損傷又一爲十寸徑重二十九噸受德國火藥二百五十五磅彈子重五百七十一磅計其速率每秒可射一千九百五十三英尺此二礮每放一次所費藥彈需一百圓 日本之王姪希來衰華卽往德國京中學水師兵法有隨員三人世家子弟六人與俱 因考近來各國無不留心武備以美國之晏安無事無外侮者已一百年日本之蕞爾一隅中國事事不與計較乃猶試礮習戰不故意荒風氣如斯而欲高言偃武息民不可得矣

十三日 雨未刻晴



日本新議院火災焚毀無遺查日本議院建造未久光緒十五年十一月日君以議院落成親詣行禮故知其未久也 新報載

醇親王薨中國使署本擬行茶會者今一概停止云 英之名士名波路滑者著一論云中國與俄爲鄰最爲勁敵爲思患豫防之計邊備所宜亟修備邊之法以鐵路爲急不獨邊防可固亦商務可興天津已興鐵路學堂延德人爲師教之風氣或可開乎 因謹按強俄之患統地球皆知之因曾於光緒九年奏陳俄人爲歐洲各國合縱所制料不能闢地於歐洲移其志而向中國中國所宜防之累一萬言大學士閻敬 言

醇親王以爲切當此前日事也

十四日晴

檀香山國王薨於金山其國政卽山前王之妹攝理云 美廷近與南卑西非克火輪公司及太平洋之輪船商定華人之潛入美境者被獲則山該公司等載回中國按名給費五十一圓該公司已允矣 初七日金山稅關派役十一名分作數班直入華人之鋪搜尋洋煙共搜九鋪獲煙四千七百七十三罐擬充公云 因按洋商列肆於中國中國向不擾之而外國多魚肉華商者則以中國兵船不到外洋而權力不足也

十五日晴是夜大風雨雪

墨西哥公使與厄瓜多國公使在美都立約 智利國內亂水師

已封本國附近祕界各海口聞英國得信立電飭遊弋太平洋兵艦前赴智利海面巡察保護英民身家產業云 因按泰西之重商如此朝廷與商患難相共呼吸相通宜其商務之盛而國富兵強也

十六日晴雪厚約一尺天氣亦不甚寒

是日爲大祭

醇親王之期因率隨員設

位行禮禮畢天始黎明 聞阿利干省米路頓埠十二日有工黨之向充鐵路工人者爲公司所辭特與華人尋隙結黨將該埠之華人悉數以繩繫項牽出埠外計華人與拒而受重傷者二人當

卽見外部請飭查辦 下議院紳金明司吉鎮司二人謁見外部  
布連請其照會俄廷力言其驅逐猶太人之非外部謂此舉各省  
人民均已稟請照辦現已將該所稟撮要遞送美國駐俄公使照  
會俄國外部云 下議院紳合阿士昨於議院核計美國興造兵  
艦自一千八百八十三年起此八年內造船身機器經費共銀  
五千三百餘萬圓鐵甲尙不在內 因按五千三百萬圓爲八年  
之用每年合六百餘萬圓此僅船身機器也益以鐵甲及礮則每  
年需千萬矣苟非國富不易籌焉

十七日晴

俄廷會議西比利亞之事有東省總督昌言曰今俄國東方兵力

猶嫌不足是當更有勝算以敵中國此時中俄有事俄之兵力僅能當華兵二十營再多亦不能敵惟西比利亞鐵路成則可限制華人越界海濱可無華人之迹俄人於彼可以廣開口岸獨攬利權云 俄商因近年印度茶葉日多一日以致由中國運來之茶不得暢售俄商失利故稟呈俄廷商務大臣請加印茶入口之稅以恤商困聞已允准英人聞之因論俄國加稅印茶英之茶商必失利云 因按俄國加稅印度之茶不慮英人之爭者則以稅則爲各國內政加減可自由也凡所以加減者非好爲軒輊蓋有深意存焉他國入口之貨非吾國所急需者則加稅以示限制其有妨吾民之生計者則重稅之甚且禁之使不入口焉其爲吾所急

需者則減稅以示招徠甚且免之使多入口焉此外有報施之道則相他國稅則之重輕以消息之也

十八日晴

謝神 法廷估水師經費一千八百九十一年需銀四千三百七十五萬餘圓內以一千萬爲製兵艦修舊船之用卽於本年在公家船廠造頭等鐵甲兵艦六艘頭等鐵甲礮艇二隻鐵甲巡船三隻頭等巡船二艘二等巡船四艘水雷巡船二艘運載軍火兵弁輪船兩艘二等運載輪船一艘帆船一艘又另在商廠造鐵甲兵艦二艘鐵甲巡船二艘三等巡船兩艘頭等水雷艇十七隻大洋水雷艇兩隻偵探船二隻 俄廷擬於今年年底在都城設廠製

造無煙火藥立即興工云 格前總統夫人云俄人待西比里亞  
鐵路落成後或請將高麗歸俄人保護允之則得寸得尺不允則  
開釁端俄之鐵路已至中國地界朝發夕至斯時中國何以禦之  
爲中國計莫若趕造鐵路迎而拒之庶不受俄人挾制俄人亦不  
敢輕舉妄動矣 因嘗稽古今之時勢信陵歸魏而秦氣阻季梁  
相隨而楚謀消此有其人而敵國不敢伐也鄭人犒師而孟明還  
秦人清野而桓溫退此有其備而敵國不敢攻也今歐洲各國無  
加兵於英俄者墨洲各邦無加兵於美者知其強也七年之病期  
非促也三年之艾亟宜蓄也

十九日

晴申刻大雨連夜

德國現擬造鐵甲兵船三艘偵探船四隻水雷艇三十八隻已撥銀一千二百萬矣 俄廷擬造鐵路由歐洲直達太平洋西岸之烏拉地岡司鐸埠其第一節由淡司克埠至衣爾喝司克埠近蒙古北界計一千五百六十八胡同脫一胡同脫計四分三米 本年便可興工查此條鐵路俄廷久有意舉造業已籌款矣 美國各巡船所有四寸速放之礮水師部擬以五寸者替易水師員弁以爲合宜云檀香山中國商董稟稱檀香山新立招工之例派華人鄭某赴中國招工到工之後立限五年出境除傭工外不准作別項商業且不得與土著一視同仁可謂苛虐查該島係未立約之國無從駁詰遂一面函致兩廣總督禁其招工一面見檀島駐美公使託



其婉爲致意刪除苛例 因查近來日本民人多赴檀香山傭工而尙能安業者則以已立通商之約而日本兵艦時時巡檀故也二十日細雨如春三月時天氣和煦樹已萌芽

義大利來電義國下議院紳士邦基昨日在議院言美國議紳所稱義國駐美之各領事官於義民來美一事屢次不遵美國例禁等情應卽詰問外部大臣格理卑曾否已查明所指各節並嚴行根究云 美上議院紳密組請議院議立太平洋電綫公司設立海綫由舊金山通至檀香山續至沙摩阿島紐西蘭島及日本國該公司須集本五百萬圓美廷須幫給二十萬圓以十五年爲限該公司傳遞電報先公後私不收美廷報費并在沿海口岸分設

支局以便辦公而正局則設於金山云 因查外洋各公司其成本輒數千百萬國雖饒富安得如許之殷商哉其得力在集股耳中國效之則多弊竇山於風氣初開章程未備而經理者非其人也因噫廢食何以濬利源襲謬沿訛適以肥奸猾是在公正廉明者提創宗風焉

二十一日 大霧晴

美上議院紳傳萊請於外部將駐墨西哥二等秉權大臣改爲頭等每年撥八萬七千五百圓以供駐墨使署公費外部允之 羅馬來電云義國戶部大臣昨在議院宣言上年庫欸入不敷出至短一千二百萬圓今年核計竭力設法籌湊亦不敷八百萬圓惟

望三年之後入能敷出則善至美國新修稅則與義國貨產尙無大礙云 美國征勦苗陳尙不得手聞仍招撫議和尙所扣減者仍照前補給云 午初赴外部布連處辭行言於中國元旦日赴祕魯布連曰祕魯地方華人甚多因曰自中祕立約禁招工後華人已減於前矣布連曰何時可返因曰大約三月之內可以卽回美都布連曰美國駐祕有公使駐巴拿馬有領事余當作書爲之先容貴大臣到彼可資照料因謝之遂辭退是日公使來見者有墨國德國日國尼格拉國又一國均以次見云

二十二日雨

戶部大臣病故差人持刺往唁 美國選舉下議院紳士之數視

各省人民之多寡而定每十七萬三千九百零一人則舉一人今民數已增故所舉亦應增上議院紳已商定矣 俄國那胡廉治日報曾著數論詆毀中國俄大臣美渣士基謂俄人當與中國講信修睦不可意存齟齬方爲輔車相倚之道若猶太人則不妨絕之也 因謹按俄廷非無知大體之人俄之君臣如從其言不但保亞洲昇平之局而俄之名亦美矣

二十三日

細雨如春三月時夜晴

智利國亂其勢日張美國商民電請派兵船保護美廷已派渣爾斯兵艦前往矣 昨見茵陳酋長數人至華盛頓緣美國西北省茵陳土人滋事美廷曾派將軍米路司帶兵往剿互有勝敗今該

酋長特行來都謁見內部大臣詳陳各部落情形并聲明美國相待不公之處也 土耳其阿洲屬地名的立玻里與法國之屬地突尼斯毗連今法人已派兵佔踞其地且稱爲本係法之屬地云 因按兼弱攻昧見於商書弱肉強食自古已然聖賢存不忍人之心務爲仁厚乃創字小之說此可以自勉而不可以責人今之時勢未有弱而不削者也

### 二十四日晴

美國擬造三暗輪之兵船其輪裝於船之中如單暗輪船之式餘二輪裝於左右如雙暗輪船之式惟高於中輪四尺六寸船中有三副汽機以運動之當游弋之時止動中輪已足如欲極速則齊

動三輪汽機轉動甚速復能省煤其速率爲每一時行四十二海里馬力有二萬零五百匹然速率無定速率之多少視汽機轉動之疾徐其馬力之大則出於英國各船之上云 因於戊辰山滬航海至津計五日而到甲申山津航海至滬計三日而到由輪船之制益精而行益速也歷考各國新成兵輪均速於舊外洋心思日出而不窮其機巧正不知何所底止矣

二十五日晴已刻雨

是夜大風如吼作簫管之聲黎明起視窗外已冰而室中仍暖如暮春時大火爐之力大矣此項火爐每日需煤半頓計八百斤

歐洲時局德奧義三國既已同盟一旦有事俄法二國亦必合力

勢使然也考德奧義三國額兵共一百十三萬七千人大礮三千九百七十二尊俄法兩國額兵一百三十四萬七千人大礮五千六百九十八尊以上兵數額外練兵與民兵尙不在內茲將五國之兵數額兵及額外民兵徹底詳查德國一百零八萬人第一次徵民兵六十二萬人二次徵民兵七十萬人總共二百四十萬人尙有備補之兵不在內也奧國九十三萬八千人民兵四十三萬八千人總共一百三十七萬六千人義國八十四萬八千人民兵三十七萬二千人總共一百二十萬人法國一百五十萬人民兵一百七十萬人總共三百二十萬人俄國一百十八萬人備補兵八十三萬二千人駐防敵國之兵十九萬三千人哥沙騎兵十五

萬四千人民兵及戍邊之兵三萬三千人總共二百三十九萬二千人兩相比較則德奧義三國共四百九十九萬七千人俄法兩國共五百五十九萬人此外尚有護衛之兵德俄兩國尙待稽查奧國四十四萬五千人義國一百六十三萬人法國九十萬人因按此美國考據家所著而報館訪得之以刊出者閱此而知近日時局講武修備實有不得不然者矣左氏所謂思啟封疆以利社稷者此俄人之用心也申公巫臣所謂勇夫重閉者此德奧義法各國之心也量力較權知己知彼人強於我則防之人弱於我則并之識時務者如斯而已事大不足恃也昔之南宋可徵矣今之浩罕機窪茂甫波蘭芬蘭琉球越南緬甸可觀矣字小更不可



得也今之俄羅斯英法等國其所吞併不可勝數矣

二十六日晴

葡萄牙國來電云禮拜六晚卽中歷二十二日駐守澳波滔埠官軍忽有數營作亂欲改葡爲民政之國幸葡廷卽派兵剿平昨考德奧義俄法五國兵數可謂多矣查其練兵之制卽太平無事亦額滿不缺有事號召可計日而集實其兵制然也其通國之人男子均須當兵德國當兵二十八年奧國二十三年義十九年法二十五年俄二十三年因查各國練兵之制大抵民年二十以上者學習三年學成後備調若干年留守若干年其中惟學習三年應入營伍備調留守其人仍各專本業不過遇有戰事則以待

不時之需非曠本業而常荷戈候戰也至四十五歲以後雖有戰事不與聞矣

二十七日晴

拜發期滿請獎又起程赴祕摺 猶太國人民一百六十家爲避俄之苛政來美擇地而居今已往美屬閩尼所達省矣大約日內即可到該省之聖保羅埠聞德國富商捐助巨款以供該猶太民人來美川資云 美國與日斯巴尼亞訂立報施條約現於前七月由日國議院紳公議其願者僅七十人不願者三百六十人遂不能訂 俄兵之在阿彌尼亞境上者今有七萬二千土耳其大恐 英報錄所伊犁信云華兵在彼大修舊時各礮臺所有殘缺

皆爲之補葺有一大礮臺以泥土爲牆牆高二丈三尺厚二丈五尺長八十丈者已經修畢牆後復有濠七尺闊一丈五尺之濠溝然礮臺雖大不甚堅固其牆已有數處裂痕更有華兵二百名以工多值少相率走散云云 俄廷擬在太平洋之烏拉地局司鐸地方創設船塢約於西歷本年三月卽中歷十七年五月興工務求廣大可容萬噸之船 因謹按此俄之窺伺墨洲也船塢如成墨洲諸小國必不安枕美國亦不能如是之坐鎮從容然其患當在二十年後也

二十八日晴夜雨

與國嗣位之太子前赴俄都謁見俄皇而商交涉事件 俄國新

造一快船名北斗星又一礮船名各絡司才切均於五月下水又  
有一大巡船名魯竟一大鐵艦名南威利奴亦將成功俄人云中  
國旅順口已造礮臺十一座打狗與臺灣均有堅固海防礮臺云  
杜延祐請假銷差 美國上議院昨日議定海防經費每年撥四  
百二十五萬圓爲鑄礮之用 西查各國海防經費按年計銀英  
國五千五百萬兩法國三千二百萬兩義國二千萬兩俄國一千  
七百萬兩德國九百萬兩所費如此非國帑充足者正未易籌焉  
二十九日雨

美國與巴西已立報施條約昨日總統哈利順示諭本國人民自  
西歷正月一號起卽照約而行查此約所訂凡美國所產之五穀

麵粉乾草鹹肉鹹魚農器工器開礦之器製造之器格致之書火  
車鐵路之器等巴西朝廷允准運入巴西口岸不納關稅又豬油  
火腴牛乳油餅棉布鐵器鋼器皮器靴鞋不計在免稅之內另木  
料木器棹椅等物馬車樹膠所製之器巴廷允准運入巴西口岸  
照以前稅則減除二成又五而巴西之生糖熟糖加非茶葉生牛  
皮等物運入美國口岸亦免納稅云云 因謹按泰西各國不諱  
言利其斤斤相持者恐利源之耗於外國而欲自保其利源也入  
口免稅之物大抵皆本國所急需故以此招徠非有所惠於他國  
也若酒若煙非民生所恃以養者則重其稅使食之者寡則亦自  
保利源也美國之麥麵每年至中國者數十萬石而中國概不征

稅并若酒若煙外國之極重者而亦免之美廷則於中國之米入美口者其征稅已過成本之半殊失平也

三十日 細雨

俄國來電云俄戶部大臣因俄廷苛待猶太人於本國商務有碍因請俄皇暫能逐客之令俄皇已經批准 因謹按觀此而知泰西之重商務也俄之君臣所以罷逐客之令者非有所愛於猶太之人也亦爲商務耳若曰吾欲投鼠而忌器云耳 義國王子至德以固德奧義同盟之局德相畢思麻現雖辭位尙幸不渝奧相楷爾諾紀力顧大局前盟益堅謂三國同盟強敵不致生心時論謂奧有賢相歐洲可保昇平嗣德主至奧京見奧主奧國迎迓盡

禮美國今年商務合入口出口之貨價計之共值美銀一千六百四十七兆較之去年增一百五十九兆可謂日新月盛分而計之進口之貨值七百八十九兆較去年增四十四兆出口之貨值八百五十七兆較去年增一百一十五兆共鐵路計十五萬二千七百四十五英里合中國五十五萬零四百零五里除內有新開鐵路七千三百五十八英里尙不能計利外一年進項計美銀一千零三兆較之去年增四十三兆核計每一英里合中國三又三厘有進款六千五百七十四圓每本銀一百圓得息十圓四角除開銷川費外實得三圓三角一年所運之貨計六百十九兆噸所載之人計四百九十五兆名因考美國出入口之貨而知其能興利而裕利源也出口之貨

溢於入口者七千二百萬則一國入口之銀歲有所增矣出口之貨又日有所增矣貨不棄地而銀不漏卮國焉得不富乎鐵路進欸計美銀一萬萬零三百萬圓以十分之七開銷用費計用費銀七千餘萬圓此七千餘萬圓者皆行車修路作工之民人所得也然則謂鐵路興而奪窮民之衣食者猶未悉此中之竅要而狃於一偏者也

因奉出使之命持節駐美已閱一年論交涉之事則韓廷告貸於美國已力阻之美艦以兵入韓城已力斥之華人之假道者美關以索銀爲質其安業者美紳以領照作難其經商成市者美之工黨以偏遷令其破家蕩產均經力駁使不行矣日斯巴尼亞設呂



宋票行於中國漸推漸廣其始也每年得利銀四十八萬兩近已倍之此我

國內政非使臣之權所能禁除者也奏請議禁或行或否當路自有權衡焉寓巴拿馬華商土人聚衆驅逐爲求美國領事就近告彼政府得以風行雷厲轉危爲安此皆使者分所當爲之事也中外之情形其有關於富強者卽此一年中綜其大概而論之中國出口之貨茶葉日減棉花日增所增之數不敵所減之數也開礦之舉開平已有成效池州迄無成功漠河甫開甯海初創得利與否視乎其人人實不易得也新疆之羅布覺爾方謀開墾上海則仿外洋以機器織布造紙湖北方查勘礦地廣東則鑄造銀錢利

之可與者次第興之有其漸矣本年入口貨物值銀一萬二千七百餘萬兩出口貨物值銀八千七百餘萬兩合出入而權之中國漏出之銀約四千萬兩此漏卮之當塞者也廣東造成兵艦三艘福州之船廠江甯上海之機器局均有起色東三省防兵日事操演此自強之可見者也惟俄人撤馬兒罕鐵路已成又興土耳其司丹之鐵路西比里亞之鐵路將進運至琿春黑龍江矣又增兵兩營於西比里亞之東派員分探新疆甘肅青海蒙古天山增黑龍江鴨綠江之兵船增布哈爾琿春之兵額禁華人越黑龍江外暨阿蘇里又查中國水陸之兵數其窺伺我邊界者力果而必深沈幾觀變之士於此知俄人之叵測焉尙喜旅順口礮臺已成全

洲之防已固京畿一帶屹若金湯如東三省鐵路成功練兵足恃  
俄人覬覦之志或可潛消乎至於各國之經營布置就因所聞所  
見者亦可得而言焉俄人興沿黑海之鐵路增置黑海之兵艦水  
雷添波蘭之兵定購法廠之槍五十萬桿其兵威所及也近奧境  
而奧自危屯德邊而德設備索土耳其之兵費廢勃爾加厘亞之  
君營波斯京城之鐵路奪穆哈刺國之兵權窺阿彌尼亞之地歐  
亞兩洲近俄之小國俄實盡之乃猶汲汲皇皇求兼併如不及是  
誠何心美之入欵一年四百餘兆量入爲出尙有羨餘其富於地  
球爲第一至於添鋼廠墾荒區積現銀增稅則講蠶桑增郵政局  
登火輪車創太平洋之電綫立報施之約此富之政也查海口設

海防築礮臺制鐵艦驗氣礮造出海水雷之艇與極速之船試鋼  
礮之用及無煙火藥之利弊此強之政也至於立例以禁各國民  
人之赴美傭工不容各國彩票之入境此又自保利權爲民保利  
權之政也創造之巧日出不窮俄以鋼爲甲胄美以氣代火藥法  
造逆風之氣毬日創泗水之戰艦德造輕質之礮與礮架礮車英  
與德鍊鐵日精所製之礮已過百噸擴而充之則鐵艦失其堅將  
爲無用之物矣蓋礮之百噸以上者其彈之力足以透厚三尺之  
鐵甲戰船之鐵甲過厚則沈薄則不足以當彈也交涉之事則祕  
林海峽一案英與美法齟齬俄又與英美齟齬關阿非利加一洲  
葡與英齟齬德幾與英齟齬而皆不至於決裂其決裂者如和之

攻亞齊美之勦茵陳沙華他之勝烏拉乖智利之亂是也日本自仿西法以來改制度易服色近又建造議院而泰西謂其有名無實然考其商務漸盛商船漸增出口之貨漸旺非無小效固未足語富強耳阿非利加一洲自古至今混沌未啟前數十年各國派人遊歷漸入內地虛實全知今則英法德義日葡諸國均以軍旅從事謀瓜分之此古今來第一變局也德人保護馬射島美人約用夏威夷之海口埠英人購卑勞支晏國之千家埠俄人設船廠於烏拉地局司鐸均注意於太平洋矣英山緬甸以窺西藏法由越南以窺廣西則得隴望蜀矣德奧義聯盟以拒俄有勇夫重閉之意焉英俄法合議以保和有趙滅秦強之憂焉機心機事無國

無之居今之勢而欲偃武銷兵與民休息勢必不能孔子之不逆億而自然先覺管文之嘗艱險而情僞盡知丹書言日慎一日完若金城讀古人書可以知所從事矣